

唐  
文  
拾  
遺

唐文拾遺卷之四

榮祿大夫三品頂戴前分巡廣東高廉道加四級臣陸心源輯

元宗皇帝

二

禁婚部民勅

男年十五女年十三以上聽婚嫁諸州縣官人在任之日不得共部下百姓交婚違者雖會赦仍離之其州上佐以及縣令于所統屬官同其定婚在前居官在後及三輔內官門閤相當情願者不在禁限

唐會要八

二十

定戶勅

定戶之時百姓非商戶郭外居宅及每丁一牛不得將入貨財數其雜匠及幕士并諸色同類有番役合免征行者一戶之內四丁已上任此色役不得過兩人三丁已上不得過一人

唐會要八十三

### 勘覆造籍勅

自今已後應造籍宜令州縣長官及錄事參軍審加勘覆更有疎遺者委所司具本判官及官長等名品錄奏其籍仍寫兩本送戶部

唐會要八十五

### 招誘戶口勅

檢獲招誘得戶口應合酬者其有課戶皆須待納租

庸然後論功

同上

歸首人報採訪使勅

諸州應歸首復業者比來每至年終皆當州縣錄奏自今已後宜令牒報本道採訪使同勘當道歸首人每州略單數同一狀奏仍挾名報所由

同上

禁兩都燒窑取土勅

京洛兩都是惟帝宅街衢坊市固須修築城內不得穿掘爲窑燒造磚瓦其有公私修造不得於街巷穿坑取土

唐會要  
八十六

禁與諸蕃互市勅

諸錦綾羅縠繡織成綢絹絲犂牛尾真珠金鐵並不  
得與諸蕃互市及將入蕃金鐵之物亦不得將度西  
北諸關

同上

### 修兩京城勅

兩京城皇城及諸門并助鋪及京城守把捉兵之處  
有城墻若門樓舍屋破壞須修理者皆與所司相知  
并量抽當處職掌衛士以漸修營若須登高臨內卽  
聞奏之

同上

### 置常平倉勅

關內隴右河南河北五道及荆揚襄夔縣益彭蜀漢

劍茂等州並置常平倉其本上州三千貫中州二千

貫下州一千貫每糶具本利與止倉帳同申

唐會要  
八十八

### 賑給水旱勅

諸州水旱皆待奏報然後賑給道路悠遠往復淹遲

宜令給訖奏聞

唐會要  
八十八

### 官錢取利勅

兩京行幸緣頓所須應出百姓者宜令每頓取官錢

一百千文作本取利充仍令所由長官專句當不得

抑配百姓

唐會要  
二十七

### 禁封家舉放勅

封家總合送入京其中有別勅許人就領者待州徵足然後一時分付徵未足間封家人不得輒到出封州亦不得因有舉放違者禁身聞奏

唐會要九十

### 食封以丁爲限勅

諸食實封並以丁爲限不須一分入官其物仍令出封州隨庸調送入京其腳以租腳錢充並於太府寺納然後準給封家

同上

### 封物就坊請頒勅

親王公主等封物宜隨官庸調隨駕所在送至京都賜坊令封家就坊請受餘食封家不在此限仍令御

史一人及太府寺官檢校分付使給了牒

同上

### 承襲實封勅

諸王公以下食封薨子孫應承襲者除喪後十分減二仍具所食戶數奏聞無後者百日後除諸名山大川及畿內縣並不封

同上

### 百官月俸勅

百官料錢宜合爲一色都以月俸爲名各據本官隨月給付其貯粟宜令入祿數同申應合減折及申請時限並依常式

唐會要九十一

### 給賜鞅鞞等國勅



靺鞨新羅吐蕃先無里數每遣使給賜宜準七千里  
以上給付也

唐會要一百

太清宮行禮用朝服勅

比太清宮行事官皆具冕服及奏樂未易舊名并告  
獻之時仍陳策祝既非事生之禮皆從降神之儀且  
真俗殊倫幽明異數理有非便亦在從宜自今已後  
每太清宮行禮官宜改用朝服兼停祝版改爲青詞  
于紙上其告獻辭及新奏樂章朕當別自修撰仍令  
所司具議儀注奏聞

唐會要五十

簡擇專知兩推勅

東西兩推及左右巡使皆臺司重務比來轉差新人  
數有改易既不經久頗紊章程宜簡擇的然公正精  
練者令始末專知不得輒替換若無缺失至改轉時  
遲速閒以爲褒貶

唐會要  
六十二

### 停御史充判官勅

所置御史職在彈違雜充判官誠非允當其諸道節  
度使先取御史充判官者並停自今已後更不得奏  
若切須奏者不得占臺中缺其本臺長官充使者不  
在此限

同上

### 御史比類能否勅

御史宜依舊制黃卷書缺失每歲委知雜御史長官  
比類能否送中書門下改轉日褒貶同上

禁私役幕士勅

衛幔幕氊褥等所由多借人非理損污因循日久爲  
弊頗深爰及幕士私將驅使并廣配充廳子馬子並  
放取資近今推問事皆非繆今後其幔幕氊褥等輒  
將一事借人並同盜三庫物科罪并使幕士與人張  
設及自驅使擅取放資計受贓數以枉法論其借人  
及借與人等六品已下非清資官決放餘聽進止仍  
委左右巡使常加糾察

唐會要  
六十五

注授評事勅

大理評事今後子弟及至親中有未歷畿縣者不得

注授

唐會要  
六十六

恤賞入朝蕃客勅

九姓堅昆諸蕃客等因使入朝身死者自今後使給  
一百貫充葬副使及妻數內減三十貫其墓地州縣  
與買官給價直其墳墓所由營造

同上

舉人箭塚勅

自今以後應試選舉人長塚宜以十隻箭爲限並入  
第一院與兩單上八隻入第一院兩隻入第二院與

一單上次上十隻不出第三院與單上十隻不出第

四院與次上餘依常式

唐會要五十九

### 停武官番試勅

習武入官已經精簡隨番更試事頗爲煩其武官自今已後因番試及過中書門下宜停同上

### 分賜胙肉勅

祭必奉牲禮有歸胙將興施惠之教以廣神明之福比來胙肉所進頗多自茲以後卽宜少進仍分賜祭

官及應入衙常參官廚共食

唐會要二十三

### 閏二月停服袴褶勅

百官朔望朝參應服袴褶并著珂璫至閏二月一日  
宜停自今以後每逢此閏仍永爲常式

唐會要  
二十四

### 從容朝參勅

自今以後每朔望朝晚于常儀一刻進外辦每座喚  
仗令朝官從容至閣門入至障外不須趨走百司無  
事至午後放歸無爲守成宜知朕意

同上

### 太守謝表附驛勅

比來牧守初上淮式附表申謝或因便使或有差官  
事頗勞頓亦資取置自今已後諸郡太守等謝上表  
宜並附驛遞進務從省便

唐會要  
二十六

寒食禁火勅

禮標納火之禁語有鑽燧之文所以燮理寒燠節宣

氣候自今以後寒食並禁火三日

唐會要二十九

停用赤色勅

近改旗幟爲赤黃以符土德其諸衛隊仗緋色者宜  
令所司依內出黃色樣卽造其槍並用赤稠木仍依  
本色不須更染別色長一丈四尺爲限其諸軍職掌  
有先用火焰緋幡處宜各依一樣送付諸道準此改  
換先用赤色宜停

唐會要三十二

聽家畜絲竹勅

五品已上正員清官諸道節度使及太守等並聽當  
家畜絲竹以展歡娛行樂盛時覃及中外

唐會要  
三十四

### 教習孝經勅

自今已後宜令天下家藏孝經一本精勤教習學校  
之中倍加傳授州縣官長明申勸課

唐會要  
三十五

### 加枉法贓律勅

官吏准律應枉法贓十五匹合絞者自今已後特宜  
加至二十匹仍卽編諸律著爲不刊

唐會要  
四十

### 贖銅納錢勅

其贖銅如情願納錢每觔一百二十文若負欠官物



應徵正贓及贖物無財以備官役折庸其物雖多止  
限三年一人一日折絹四尺若會恩旨其物合免者  
停役

同上

專知敘勳勅

准制及格式敘勳今後宜令司勳員外郎二人除曹  
務之外每有勳甲團進後專知磨勘所須主事令史  
任簡擇差定如有疏略委本官奏錄

唐會要  
五十八

詳定元元廟樂勅

古今人表元元皇帝升入上聖自今已後每有薦新  
先獻元元廟其緣告享所奏樂宜令所司詳定奏聞

并差宗正寺官一員及差戶洒埽兩京崇元學各置  
博士助教一員學生一百人資蔭宜同國子學例每  
祠享所齋郎便以學生充當

唐會要  
五十

### 檢校元元宮勅

兩京元元宮及道院等宜委崇元館大學士都檢校  
務在精修勿令喧雜仍不更隸宗正其道士等名籍  
任依常式

同上

### 內外官考進單數挾名勅

所校內外官考准令京官正月三十日進單數二月  
三十日進挾名外官二月三十日進單數三月三十

日進挾名自今已後並了日一時挾名奏不須更進

單數

冊府六百三十五

關內庸調徵限勅

勅自今已後京兆府關內諸州應徵庸調及資物并

限十月三十日畢

冊府四百八十七

徵收庸調期限勅

自今已後天下百姓宜以十分已上爲中男二十三

已上成丁每歲庸調八月徵收農功未畢恐難濟辦

自今已後延至九月二十日爲限

同上

選人放留條目勅

吏部選人書判藍縷及雜犯不合得留者不限選數並放除此之內先從選深人一槩並留其選深被放人選淺得留名且放選留膀示選人各令知委仍以單狀奏聞不須更起條目

冊府六  
百三十

申嚴遠州不肯到官勅

如聞黔州管內州縣官員多闕吏部補人多不肯去成官已後或假解或從正考滿得資更別參選自餘管蠻僚州大率亦皆如此所司於諸色選人內卽召補並馳發遣至州令都府勘到日申所司如遲違牒管內都督史口口追毀告身更不須與官

冊府

公卿巡謁諸陵勅

每年春秋二時巡謁諸陵差公卿各一人奉禮郎一人右校署令一人其奉禮郎右校署令自今已後宜停至陵所差縣官及陵官攝行事其巡陵儀式宜令太常寺修撰一本送令管陵縣收掌長行需用仍令博士助教習讀臨時讚相永爲常式

唐會要二十

置三皇五帝廟勅

三皇五帝創物垂範永言龜鏡宜有欽崇三皇伏羲以勾神農以祝軒轅以風后五帝少昊以蓐芒配神農融配軒轅力牧配五帝少昊以蓐芒配神農契配唐堯以義仲虞舜以夔其擇日及置廟

眞高辛

以稷契配

唐堯

以義仲和叔配

虞舜

以夔龍配

其擇日及置廟

地量事營立其樂器請用宮懸祭請用少牢仍以春

秋二時致享其置令丞令太常寺檢校

唐會要  
二十二

麴鹽並勒斗量勅

自今已後麴皆以三斤四兩爲斗鹽並勒斗量其車

軸長七尺二寸除陌錢每貫二十文餘麴等同

唐會  
要六

六十

本色人充將作監勅

將作監所置且合取當司本色人充直者宜卽簡擇  
發遣內作使典亦不得輒取外司人充其諸司非本  
色直及額外直者亦一切並停自今以後更不得補

置如歲月深久尙或因人所由長官量事貶降其所  
應直決一頓配糴邊軍

唐會要  
六十六

### 安存致仕官勅

如聞六品已下致仕官四載之後准各並停念其衰  
老必藉安存豈限其高卑而恩有差降應五品下致  
仕官並終其餘年仍永爲常式

唐會要  
六十七

### 停六品以下員外官勅

內外六品已下員外官至考滿日一切並停各依選  
例自今已後更不得注擬其皇親幼小及諸色承優  
授官軍功伎術內侍省左右龍武軍並諸蕃官等不

在此例

同上

刺史犯賊加等勅

收宰字人所寄尤重至於祿料頗亦優豐自宜飭躬勵節以肅官吏如聞或犯賊私深紊綱紀今後刺史犯賊宜加常式一等

唐會要六十八

刺史不得兼別職勅

簡擇刺史冀令撫字諸使等或奏兼別職掌政治有妨既闕親人仍乖本意自今已後更不得別奏請

同上

郎官御史先取縣令勅

親民之官莫過於縣令比來選司取人必限書判且



文學政事本是異科求備一人百中無一況古來良  
宰豈必文人自今已後郎官御史先於縣令中三考  
已上有政績者取仍永爲常式

唐會要  
六十九

禁官吏放債勅

郡縣官寮其爲貨殖竟交互放債侵人互爲徵收割剝  
黎庶自今已後更有此色并追人影認一匹以上其  
放債官先解見任物仍納官有剩利者准法處分

同上

選取飛騎勅

應募飛騎請委郡縣長官先取長六尺不足卽選取  
五尺九寸已上灼然濶壯膂力過人者申送

唐會要  
七十二

諸州醫學附甲勅

諸州醫學生等宜隨貢舉人例申省補署十年與散  
官恐年歲深久檢勘無憑仍同流外例附甲

唐會要  
七十五

宏文學生帖試勅

宏文館學生自今已後宜依國子監學生例帖試明  
經進士帖經並減半雜文及策皆須粗通仍永爲恆

式

唐會要  
七十七

不差孝假勅

頃以鄉閭侍丁優給孝假官吏等仍科雜役天寶初  
已遣優矜如聞比來乃差征鎮豈有捨其輕而不恤

其重放其役而更苦其身眷言及此良用恤然自今  
後將侍丁孝假不須差行

唐會要  
八十二

### 官典受錢同枉法贓勅

自今已後天下兩稅其諸色輸納官典受一錢已上  
並同枉法贓論官人先解見任典正等先決四十委  
採訪使巡察若不能舉按者採訪使別有處分

唐會  
要八

### 團貌定戶勅

今載諸郡因團貌宜便定戶自今已後任依常式應  
緣察問對眾取平准今載五月五日勅處分

唐會要  
八十五

退團貌勅

天下郡縣雖三年定戶每年亦有團貌計其轉年合入中男成丁五十九者任退團貌

同上

禁關西諸國興販勅

如聞關已西諸國興販往來不絕雖托以求利終交通外蕃因循頗久殊非穩便自今已後一切禁斷仍委四鎮節度使及路次所由郡縣嚴加捉搦不得更有往來

唐會要八十六

置廣運潭勅

古之善政貴於足食欲求富國必先利人朕以關輔

之閒尤資殷贍比來轉輸未免艱辛故置此潭以通  
漕運萬世之利一朝而成其潭宜以廣運爲名唐會  
要八

七十  
兼官俸料不兩給勅

京官兼太守等官俸料兩給者宜停其外官太守兼  
京官除準式親王帶京官外任官副大將軍副使知  
軍及正事京官兼內外官知政事據文合兼給者餘  
並從一處給任逐穩便唐會要  
九十

郡縣缺職錢納當郡勅

郡縣闕職錢送納太府寺自今已後納當郡充員外

官料錢不足卽取正官料錢分若無員外官當郡分  
唐會要  
九十一

停免白直錢勅疑

郡縣官人及公廨白直天下約計一載破十萬丁已  
上一丁每月輸錢二百八文每至月初當處徵納送  
縣來往數日功程在於百姓尤是重役其郡縣白直  
計數多少請用料錢加稅充用其應差丁充白直望  
請並停一免百姓艱辛二省國家丁壯同

職田送所管州縣勅

兩京百官職田承前佃民自送道路或遠勞費頗多

白今已後其職田去城五十里內者依舊令佃民自送入城自餘限十月內便於所管州縣并腳價貯納其腳價五十里外每斗各徵二文一百里外不過三文並令百官差本司請受

唐會要九十二

### 改年爲載勅

勅天寶三年改爲三載者所論前後年號一切爲載其後造帳計歲月云若干載自餘表狀文章並准此

冊府四百八十六

### 男丁計年正役勅

比者成童之歲則挂輕徭旣冠之年便當正役憫其

勞苦用軫予懷自今已後百姓宜以十八以上爲中

男二十三已上成丁

同上

處分偽畫印勅

其偽畫印宜用偽鑄印刻印之例處分永爲常式

唐會

要四十一

太史監官入朝勅

太史監官除朔望朝外非別有公事一切不須入朝  
及充保識仍不在點檢之限

唐會要四十四

南嶽投龍告文

大唐開元神武皇帝李隆基本命乙酉八月初五日



降誕夙好道真願蒙神仙長生之法謹依上清靈文  
投刺紫蓋仙洞位忝君臨不獲朝拜謹令道士孫智  
涼賁信簡以聞惟金龍歸傳

與倭皇書

皇帝問倭皇使人長吏大禮蘇因高等至具懷朕欽  
承寶命臨御區宇思弘德化覃被含靈愛育之情無  
隔遐邇知皇命居海表撫寧民庶境內安樂風俗融  
和深氣至誠遠修朝貢丹款之美朕有嘉焉稱暄比  
如常也故遣鴻臚寺堂客裴世清等稍宣往意并送  
物如別時

肅宗皇帝

事蹟詳全唐文四十二

贈故利州司功參軍嚴方約等制

門下有後之慶諒存乎義方飾終之典用彰於錫類  
故利州司功參軍嚴方約等早申嘉績夙負奇才名  
器重於當時闕著於遺烈雖舟壑已謝久淪過隙之  
期而子孫皆賢實積高門之屬恩加令嗣澤及先  
臣宜優表贈之禮俾洽闕榮

前件主者施

行

黃本顏魯公  
文集卷十七

贈顏惟貞祕書監等官制

門下悼往之義必在

之興允資於錫類

銀青光祿大夫行尚書

父贈貝州刺史

璩等才業貞修風襟淳茂或

踐於周行

或幹用馳聲備更於歷選或量才未適或稟命不融  
永惟過隙之悲是得承家之美教忠斯在行慶攸歸  
宜覃泉壤之恩式叶哀榮之命可依前件主者施行  
同上

贈韓擇木亡母張氏等制

門下禮厚飾終義殷錫類永惟泉壤諒在哀榮金紫  
光祿大夫守太子少保集賢殿學士副知院事上柱

國昌黎郡開國公韓擇木亡母贈南陽縣太君張氏  
等柔順壺儀慈和家範含章內備純德外昭遽從遷  
壑之悲空聞擇鄰之訓顧其嗣光我縉紳或已及  
追封或未從表贈載覃渥澤爰洽幽明宜宏休命俾  
協彝典可依前件主者施行

同上

賜韋見素等子孫一人官詔

太子太師見素太子少傅李遵太子少保韓擇木太

子賓客嗣吳王祇太子詹事兼楊州長史崔圓並承  
東宮優異品秩已高不可更改宜各與子孫一人官

冊府七百十一

備國馬詔

園苑內有閑廐使總監各據所管地界耕種收草粟

以備國馬

冊府六百二十一

停採訪黜陟使詔

近緣狂寇亂常每道分置節度其管內緣徵發及文  
牒兼使命來往州縣非不艱辛仍加採訪轉益煩擾  
其採訪使置來日久并諸道黜陟使便宜且停待後

當有處分

唐會要  
七十八

典貼虛實詔

應典貼莊宅店鋪田地磴碾等先爲實錢典貼者令  
還以實錢價先以虛錢典貼者令以虛錢贖其餘交  
關並依前用當十錢

唐會要  
八十九

慎擇御史勅

風憲之地百寮準繩頃者有司殊非慎擇其御史須  
曾任州縣理人官者方得薦用

唐會要  
六十二

均平科役勅

諸州百姓多有流亡或官吏侵漁或盜賊驅逼或賦

歛不一或徵發過多俾其怨咨何以輯睦自今已後  
所有科役須使均平本戶逃亡不得輒徵近親其鄰  
保務從減省要在安存

唐會要  
八十五

### 量給官祿勅

天下郡府及縣官祿白直品子等課從今年正月一  
日已後並給一半事平之後當續支還

唐會要  
九十

### 賊數約緝估勅

先准格例每例五百五十價估當緝一匹自今已後  
應定賊數宜約當時緝估並准實錢庶叶從寬俾在

不易

唐會要  
四十

又勅

名例律評賊者皆據犯處當時物價及上絹估評功庸者計一人一日爲絹三尺牛馬驢騾車亦同其船及碾磴邸店之類各依當時賃直庸雖多不得過其本價自今已後應定賊數宜約當時絹估並准實錢上同

縣令等官准故事選擬敕

縣令錄事參軍自今已後選司所擬宜准故事過中

書門下更審詳擇仍永爲常式

唐會要  
六十九

簡擇巧兒修理金吾墻勅



左右金吾內外廊所緣牆壁廊宇器械等破碎並宜  
于當色月番人中簡擇巧兒隨事修理如更別創造  
緣牆宇所須一切已上俱錄狀奏仍永爲恆式

唐會要七

外官給半料京官不給勅

天下都府及縣官祿白直品子等課從乾元元年外

官給半料與職田京官亦與職田不給料

至德已後內外官無

料錢至是給之

仍勅度支使量閑劇司給手力課員外官一

切無料

冊府五百六

逃戶田宅官爲租賃勅

逃戶租庸據帳徵納或貨賣田宅或攤出鄰人展轉  
誅求爲弊亦甚自今已後應有逃戶田宅並須官爲  
租賃取其價直以充課稅逃人歸復宜並卻還所由  
亦不得稱負欠租賦別有徵索

唐會要  
八十五

### 宣付諸州文狀勅

諸司使諸州府進奏文狀應合宣行三紙已上皆自  
寫宣付四本中書省宣過中書省將兩本與門下省

唐會要  
五十四

### 簡擇常參官勅

散騎常侍且各置常參官兩人令自簡擇聞奏參典

亦置兩人

同上

勿信中使宣言勅

諸道州府所承上命須憑正勅後可施行不得懸信

中使宣言勅卽便遵行

唐會要六十五

客戶編附百姓勅

客戶若住經一年已上自貼買得田地有農桑者無

間于莊蔭家住及自造屋舍勒一切編附爲百姓差

科比居人例量減一半庶填逃散者

唐會要八十五

安存現在百姓勅

近日已來百姓逃散至於戶口十不半存今色役殷

繁不減舊數既無正身可送又遣鄰保祇承轉加流  
亡日益艱弊其實流亡者且量蠲減見在者節級差  
科必冀安存庶爲均濟

同上

### 勒留過客器械勅

駱谷金牛子午等路往來行客所將隨身器械等今  
日以後除郎官御史諸州部統進奉事官任將器械  
隨身自餘私客等皆須過所上具所將器械色目然  
後放過如過所上不具所將器械色目數者一切于  
守捉處勒留

唐會要  
八十六

### 刺史縣令改轉例勅

刺史縣令自今已後改轉刺史三年爲限縣令四年  
爲限員外及攝試官一切不得釐豫

冊府六  
百三十

賜諸王手札

朕之兄弟惟有五人比爲方伯歲一朝見雖載崇藩  
屏而有睽談笑是以輟牧人而各守京職每聽政之  
後延入宮中申友于之志詠常棣之詩邕邕如怡怡  
如展天倫之愛也

南郡  
新書

唐文拾遺卷之五

榮祿大夫三品頂戴前分巡廣東高廉道加四級臣陸心源輯

代宗皇帝

事蹟詳全唐文四十六

選擇郎官制

周有六卿分掌國柄各率其屬以宣王化今之尚書省卽六官之位也古稱會府實曰政源庶務所歸比于喉舌猶天之有北斗也朕纂承丕緒遭遇多艱典章故事久未克舉其尚書宜申明令式一依故事諸司諸使及天下州府有事准令式各申省者先申省

司取裁并所奏請勅到省有不便于事者省司詳定  
聞奏然後施行自今以後其郎官有闕選擇多識前  
言備諳故事志業正直文史兼優者勿收虛名務取  
實用六行之內眾務畢舉事無巨細皆中職司酌于  
故實遵我時憲凡百在位悉朕意焉

唐會要  
五十七

誅姜慶初等并削裴倣官爵制

授顏真卿刑部尚書告

門下昔舜命咎繇□□□明于五刑惟刑克允重  
華聖帝也□□□庭堅理臣也□□□明金紫光  
祿大夫使持節湖州諸軍事前□□刺史本州團練  
守捉使上柱國魯郡開國公顏真卿含和毓靈□□  
□義繼文儒□□宏亮直之風執禮□□□變雅  
揚名四□□三朝夙著嘉□□彤大節旣茂次公  
之績□□越石之勳詢□□□堪登右序矯枉□正  
亦會左遷知進退而□□一心交榮悴而□□□  
今載舉遺典重□庶獄以遵舊服其教在□□刑部  
尚書散官勳封如故主者施行

黃本顏魯公  
文集卷十七



復左藏庫詔

凡財賦皆歸左藏庫一用舊式每歲於數中擇精好之物進三五十萬匹納入大盈庫而度支先以其全數聞

冊府四百八十四

優獎功臣後嗣詔

武德貞觀之間有若魏徵王珪李靖李勣房玄齡杜如晦等扶翼大運勤勞王家尊主庇人匪躬致命咸有一德格于皇天緬然長懷風烈猶在其後嗣沈翳將加優獎如廟宇荒毀卽宜修葺無德不報何日忘

之

冊府一百三十九

京兆府屬官迴避詔

中書門下及兩省五品已上尙書省四品已上御史  
臺五品已上諸同正員三品以下諸王駙馬中要周  
莽上親及女婿外甥不得任京兆府判司畿令赤縣  
丞簿尉

冊府六  
百三十

州縣官不得聽本貫人任詔

不許百姓任本貫州縣官及本貫鄰縣官京兆河南  
府不在此限

同上

召募官健詔

諸道軍甲每年秋末冬首一申春夏不須申其官健

逃亡非承正制初不得輒召募

唐會要七十二

顯要官子孫不得擬授州縣勅

勅見任中書門下兩省五品已上尚書省三品已上

子孫合授官者一切擬京官不得擬州縣官

冊府六百三十

諸司闕官職田充修廨宇勅

京諸司闕官職田苗子自今以後宜並充修當司廨

宇用其草准式處分仍令分司監察御史勾當

冊府五百

六

諫官每月奏對勅

諫官奏事不須限官品次第于每月奏事官數內聽

一人奏對

唐會要五十六

逃人物業量授附籍人勅

如有浮客情願編附請射逃人物業者便准式據丁口給授如二年已上種植家業成者雖本主到不在

卻還限任別給授

冊府四百九十五

郎中員外任刺史勅

郎中得任中州刺史員外郎得任下州刺史用崇岳牧之任兼擇臺郎之能

唐會要六十八

府縣替除勅

諸州府縣今後有才不稱職及犯贓私卽任本使及

州府奏人請替除並不在奏請其所許奏人仍須灼然公清曾經驅使者課効資厯當者兼具厯任申報年月并所替官合替事由同奏

唐會要六十九

諫官每月上封事勅

諫官令每月一上封事指陳時政得失

唐會要五十六

帶職官不用缺勅

諸州府錄事參軍及縣令其有帶職兼官判試權知檢校等官者自今已後吏部不在用缺之限

唐會要六十九

罷不通經業兩館生勅

宏文崇文兩館生皆以資蔭補充所習經業務須精

熟楷書字體皆得正樣通者與出身不通者罷之

唐會

要七  
十七

### 巡檢衢路勅

如聞諸軍及諸府皆於道路開鑿營種衢路隘窄行李有妨苟徇所資頗乖法理宜令諸道諸使及州府長吏卽差官巡檢各依舊路不得輒有耕種并所在橋路亦令隨要修葺

唐會要  
八十六

### 五方上帝等祠用豬羊勅

五方上帝九宮並大祠朝日夕月百神大社先農釋奠並中祠自今以後大社用犢中祠用豬羊各一委

所司支給送太常八條其副准前

唐會要  
二十三

給明衣絹勅

自今已後五品以上及監察御史太常博士宜准式  
給明衣絹及浴巾餘准常例其布絹支左藏庫青苗  
物充

同上

給百官喪葬人夫勅

應准勅供百官喪葬人夫幔幕等三品已上給夫一  
百人四品五品五十人六品已下三十人應給夫須  
和雇價直委中書門下文計處置其幔幕鴻臚衛尉  
等供者所須載幔幕張設人並合本司自備如特有

處分定人夫數不在此限

唐會要三十八

還櫬入城勅

如聞士庶在外身亡將櫬還京多被有司不放入城

自今已後不須止遏

同上

奏送解天文人勅

艱難以來疇人子弟流散司天監官員多闕其天下

諸州官人百姓有解天文元象者各委本道長吏具

名聞奏送赴上都

唐會要四十四

州府改革申尚書勅

天下諸使及州府須有改革處置事一切先申尚書



省委僕射以下商量聞奏不得輒自奏請

唐會要五十七

流外人不授州縣勅

流外出身人今後勿授刺史縣令錄事參軍諸軍諸使亦不得奏請仍委所由檢勘雖恩制所授並不得與上同會缺不成赴集如須要甄錄者牒中書門下吏部改與別官

唐會要五十八

拆毀臨市樓閣勅

諸坊市邸店樓屋皆不得起樓閣臨市人家勒百日

內毀拆

唐會要五十九

檢校祕書勅

祕書省書閣內書自今後不得輒供諸司及官人等  
每月兩衙及雨風委祕書郎典書等同檢校遞相搜  
出仍舊封閉

唐會要  
六十五

較印斗秤勅

自今以後應付行用斗秤尺度准式取太府寺較印

然後行用

唐會要  
六十六

都水監造掌魚鰓勅

應祠祭乾魚鰓宜令都水監依樣每年起十月造掌  
隨祭俱用其醢魚肉據用數依限送光祿寺令供造

同上

刺史替代降魚書勅

諸州刺史替代及別追皆降魚書然後離任無事不得輒追赴使及出境刺史有故闕使司不得差攝但令上佐知州事

唐會要六十九

金吾置判官勅

左右金吾引駕仗自今已後每仗置判官兩人左右街使置判官一人並取金吾將軍衛佐充二周年放選優與處分

唐會要七十一

停止禁衛充手力等勅

左右金吾引駕仗三衛等承前以來抽充三番將軍

手力及都知判官等處并承旨省中承符驅使仍取  
資課供用禁衛之人不合擅離職掌自今以後宜一  
切停止

同上

精擇中郎將勅

入閣升殿中郎將等帶刀升殿職掌不輕宜委中書  
門下精加選擇仍以品第于廊下別與置廚其千牛  
郎將宜准此

同上

禁止皇親交婚軍將勅

皇五等已上親不許與軍將婚姻駙馬郡主壻不許

與軍將交遊

唐會要  
七十二

量定進士冬集授散勅

禮部送進士明經明法宏文生及崇賢生道舉等准式據書判資蔭量定冬集授散其春秋公羊穀梁周禮儀禮業人比緣習者校少開元中勅一例冬集其禮業每年授散自今以後禮人及道舉明法等有試書判稍優并蔭高及身是勳官三衛者准往例注冬集餘並授散

唐會要  
七十五

童子出身勅

童子舉人取十歲以下者習一經兼論語孝經每卷誦文十科全通者與出身仍每年冬本貫申送禮部

同明經舉人例考試訖聞奏

唐會要七十六

董晉等充三司使勅

御史中丞董晉中書舍人薛蕃給事中劉廼宜充三司使仍取右金吾廳一所充使院并於西朝堂置幕

屋收詞訟

唐會要七十八

品官依戶納稅勅

天下及王公已下自今已後宜准度支長行旨條每年稅錢上上戶四千文上中戶三千五百文上下戶三千文中上戶二千五百文中中戶一千文下下戶一千五百文下上戶一千文下中戶七百文下下戶

五百文其現任官一品准上上戶稅九品准下下戶稅餘品並准依此戶等稅若一戶數處任官亦每處依品納稅其內外官仍據正員及占額內闕者稅其試及同正員文武官不在稅限其百姓有邸店行鋪及爐冶應准式合加本戶二等稅者依此稅數勘責徵納其寄莊戶准舊例從八等戶稅寄住戶從九等戶稅比類百姓事恐不均宜各遞加一等稅其諸色浮客及權時寄住戶等無間有官無官亦所在爲兩等收稅稍殷厚者准八等戶稅餘准九等戶稅如數處有莊田亦每處納稅諸道將士莊田旣緣防禦勤

勞不可同百例並一切從九等輸稅

唐會要  
八十三

### 禁割貫改名勅

名籍一家輒請移改詐冒規避多出此流自今已後

割貫改名一切禁斷

唐會要  
八十五

### 修造橋梁勅

承前府縣並差百姓修理橋梁不逾旬月卽被毀拆  
又更差勒修造百姓勞煩常以爲弊宜委左右街使  
勾當捉搦勿令違犯如歲月深久橋木爛壞要修理  
者左右街使與京兆府計會其事申報中書門下計  
料處置其坊市橋令當界修理諸橋街京兆府以當



府利錢充修造

唐會要八十六

限正月修橋勅

其坊市內有橋不問大小各仰本街曲當界其修仍令京兆府各差本界官及當坊市所由勾當每年限正月十五日內令畢如違百姓決二十仍勒依前令修文武官一切具名聞奏節級科貶如後續有破壞仍令所由時看功用多少計定數修理不得輒剩料率及有隱欺

同上

職田徵收各送本官勅

內外文武官職田及公廨田準式州縣每年六月三

下日徵收給付本官近來不守常規多不申報給付之際先付清望要官其閒慢申官卽被延引不付自今以後準式各令送付本官又準式職田黃籍每三年一造自天寶九載以後更不造籍宜各委州縣每年差專知官巡覆仍造簿依限申交所司不得隱漏及妄破蒿荒如有違犯專知官及本典準法科罰唐會要九十二

軍器本錢放利勅

軍器公廨本錢三千貫文放在人上取利充使以下食料紙筆宜於數內收一千貫文別納店舖課錢添

公廨收利雜用唐會要九十三

建雙廟勅

頃者國步艱難妖星不落中原板蕩四海橫流公等  
內總羸師外臨勅敵析骸易子曾未病諸兵盡矢窮  
乃其憂也嗚呼天未悔禍人何以堪甯甘殺身不附  
凶黨信光揚於史冊可龜鑑于人倫其立廟焉時以

祭祀海甯州志

戒理匭使勅

理匭使但任投匭人投表狀於匭中依進來不須勘  
責副本并妄有盤問及方便止遏唐會要五十五

宰臣出鎮許百官迎送劾

宰臣出守方鎮中書門下并百官迎送不須聞奏會要

德宗皇帝

事蹟詳全唐文五十

常參官初授讓一人自代制

常參官及節度觀察防禦軍使都知兵馬使刺史少尹赤令畿令及大理司直評事授訖三日內於四方館上奏讓一人自代其外官委長吏附送其表付中書門下每官闕以舉多者授之

冊府六  
百三十

諸色罷使冬季聞奏制

自今已後應諸色使行軍司馬判官書記參謀支使  
推官等使罷者如是檢校試五品已上不合于吏部  
選集並任准罷使郎官御史例冬季聞奏

唐會要  
七十五

### 條件息利本錢制

百官及在城諸使息利本錢徵放多年積成深弊宜  
委中書門下與所司商量其利害條件以聞不得擅

有禁錢務令通濟

唐會要  
九十三

### 宣讀時令制

自今以後每至四孟月迎氣之日令所司宣讀時令

朕當與百辟卿士舉行之

唐會要  
二十六

支給郡縣主錢詔

郡縣主聳有正員官停者郡主每季給錢七十千縣主每季給五十千郡縣主聳已亡歿者亦准此支給

冊府五百六

褒劉昌城平涼詔

平涼當舊會之衝居北地之要劉昌請城于茲分兵保戍實以遏其要衝保寧邊鄙

冊府四百十

宣賜淮西鎮守軍及諸道行營將士詔

淮西接界州縣本軍鎮守及諸道赴行營將士等宜共賜物二千萬端正以充賞設仍委本道條錄聞奏

並與甄敘其行營將健各放歸本道明加宣諭令悉

朕懷

冊府百二十八

賜故太尉段秀實祭葬立碑詔

贈太尉段秀實天授貞烈激其頽風蒼皇之中密蘊  
雄斷將舒國難詭收寇兵撓其克謀果集吾事挺身  
徑進奮擊渠魁英名凜然正邁千古宜差官致祭并  
旌表門閭緣葬所要一切官給仍於墓所官爲立碑  
以揚徽烈諸軍將士有身死王事委本使具名銜聞  
奏卽與褒贈

冊府百三十九

減諸道手力詔

今年十月三日權減諸道諸州刺史判軍事料及專知勾當官加手力課并減州縣官手力門倉庫獄囚子驛館廨宇等錢宜一切卻仍舊

唐會要九十一

### 竇克構准赴選詔

竇克構宜令赴選仍委有司比類前任正員官依資注擬自今已後郡縣主壻除丁憂外有曾任正員官停檢校官俸料者亦准此處分其餘先是兼試同正員等不在選序者停檢校官俸料任便赴集有司據檢校官量降三資與正員官元無官與解褐正員官

冊府六  
百三十



封韓滉晉國公詔

江淮轉運檢校尚書左僕射平章事韓滉勵精勤職  
夙夜在公漕輓資儲千里相繼可封晉國公

將軍以下充武成王廟獻官詔

虞書云帝德廣運乃聖乃神乃武乃文則化武功皇  
王之二柄祀禮教敬國帝孔明稽開元舊儀可爲則  
其武成王廟自今以後宜令上將軍以下充獻官餘

依李紆所奏

大唐郊  
祀錄十

條件五品以上武官去任詔

軍衛及率府五品以上正員武官得替及以理去任

者宜令兵部准五品已上文官例每年作格限條件

聞奏

冊府六百三十

減常膳詔

古者天子不修德下民罹其禍則內府損服御太常  
減膳以克責朕德信不著姦臣不判今兩河之閒兵  
革未戢郡道疲於徵斂百姓失業不得農桑朕是以  
對案輟食私自貶損其供常膳有司宜省之太子諸  
王已下食物亦各節其數

唐會要五十三

給郡縣主壻月俸詔

郡主壻檢校四品京官者戶部月給俸錢三十千文

度支歲給祿米一百二十石縣主壻檢校五品京官  
給俸錢二十千文祿米百石其有出身及先任正官  
并負才學政術欲從上舉選者聽之如官已登朝不  
用此制

唐會要六

置神策軍統軍詔

左右神策軍特爲親近宜署統軍以崇禁衛其品秩  
俸祿料一事以上同六軍統軍例

唐會要七十二

報權德輿詔

非不知卿勞苦以卿文雅尙未得如卿等比者所以  
久難其人

唐會要五十五

注擬大理太常官闕勅

大理法官及太常禮官宜委吏部每至選時簡擇才

識相當者與本司商量注擬

冊府六  
百三十

令中書省檢勘行在授官勅

應去冬奉天行在給勅牒授官人等宜令中書門下

檢勘牒文憑據分明卽與依授官日月進畫已後檢

日並畫日爲定不得用所行下月限

同上

五品官不合選補使注擬勅

五品官准式不合選補使注擬宜付吏部檢勘訖送

中書門下其據資敘卻合授六品已下官任便處分

同上

散騎常侍不兼任使勅

左右散騎常侍是中書門下正三品官謂之侍極宰臣次列除特委方面者餘不合兼任使先已授者宜改與別官自今已後更不得注授

唐會要五十四

選人由歷附所司申聞勅

除常參官及諸使判官等餘並附所司申其兵部選

人亦准此

冊府六  
百三十

放免逃亡息本勅

自今後應徵息利本錢除主保逃亡轉徵鄰近者放

免餘並準舊徵收其所欠錢仍任各取當司闕官職  
田量事糶貨充填本數并已後所舉不得過二十貫

唐會要  
九十三

### 令常參官舉堪任縣令等官勅

宜令清資常參官每年於吏部選人中各舉一人堪  
任縣令錄事參軍者所司依資注擬便於甲歷具所  
舉官名銜仍牒報御史臺如到任理政尤異及無贓  
犯事蹟明著所司錄舉官姓名聞奏當議褒貶仍長  
名後二十日內舉畢仍永爲常式

冊府六  
百三十

### 御史分察六部勅

監察御史六人承前所定皆是從下次舊例從下又  
合出使若一人出使兼有故則六察御史遞相移改  
今請令監察從上第一人察吏部禮部第二人察兵  
部工部第三人察戶部刑部每年終議其殿最唐會  
要六  
十

### 停東西推官勅

知東推西推侍御史各一人臺司以推鞠爲重務請  
令第一殿中同知東推第二殿中同知西推仍分日  
受事一人有故同推便知先所置推官二員請停唐  
會

要六  
十二

升興元府勅

梁州昇爲興元府官員資敘一切同京兆河南府會

要七十一

重考不合選應舉人勅

禮部應進士舉人等自今以後如有試官并不合選并諸色出身人有應舉者先於舉司陳狀准例考試如才堪及第者送名中書門下重加考覈如實不堪卽令所司追納告身注毀官甲准例與及第至選日仍稍優與處分其正員不在舉限

冊府六  
百四十

簡擇待制官勅



宜令中書門下兩省分置待制官三十員仍于見任  
前資及同正兼試九品已上官中簡擇文學理道兵  
鋒法度優深者具名聞奏度據品秩量給俸錢并置  
本收利供廚料所須幹力什器廳宇等并計料處分  
唐會要  
二十六

禁採捕勅

自今已後每年五月宜令天下州縣禁斷採捕弋獵  
仍令所在斷屠宰永爲常式并委州府長吏嚴加捉  
擄其應合供陵廟並依常式

唐會要  
四十一

減文武百官月料勅

文武百官每月料錢一百貫已上者三分減一八十  
貫已上者五分減一六十貫已上者七分減一四十  
貫已上者十分減一三十貫已下者不減待兵革甯  
後仍舊給

冊府五  
百六

支給致仕官祿料勅

致仕官所請半祿料及賜物等並宜從勅出日於本  
貫及寄住處州府支給

唐會要  
六十七

給公主等封物勅

諸公主每年各給封物七百段正此依舊例春秋兩  
限支給諸郡主每季各賜錢一百貫文諸縣主每季

各賜錢七十貫文其郡縣主壻見任前資正員外員

官等一依支給

唐會要六

駙馬無子不用母蔭勅

駙馬郡縣主如實無子準式養男並不得用母蔭

同上

太尉攝祭南郊勅

郊壇時祭燔柴瘞埋並依天寶十三年制自今以後

攝祭南郊太尉行事前一日于致齋所具羽儀鹵簿

公服引入親受祝版及赴清齋所

唐會要九

郊廟行禮不施褥勅

至廟行禮不得施褥至敬之所自合履地而行至南

郊亦宜准此

唐會要十三

馬燧祔廟勅

贈太傅馬燧祔廟宜令所司供少牢仍給鹵簿

唐會要十

九

嗣郡王庶子班位勅

今後嗣郡王列於官班之上庶子宜在卿之上

唐會要二

五十

功臣分二等勅

國初以來將相功臣名跡崇高功效明著者宜差次

分爲二等

唐會要四十五

待制官各陳所見勅

宜令每日待制官各陳所見一條仗下後封進觀古  
畧兼補闕拾遺有足匡時固宜無隱如事煩細非理  
道所切者不須同上

許百官送太傅燧葬勅

故司徒兼侍中贈太傅燧今月九日葬七日發引百  
官不須入朝便于城外送發引唐會要三十八

嗣王葬用鹵簿勅

自今已後嗣王薨葬日宜令所司並供鹵簿仍永爲

常式

同上

喪葬給鹵簿勅

自今已後應緣喪葬俱給鹵簿卽遂便于街中宿幔

同上

死刑停先決杖勅

比來所司斷罪拘守科條或至死刑猶先決杖處之  
極法更此傷殘惻隱之懷實所不忍自今已後罪之  
死者先決杖宜停

唐會要  
四十

疏理禁囚勅

農事方興時雨猶少言念囚繫慮有滯冤京城百司  
及畿內有禁囚李士政等六人合處極法宜從寬典

各決四十配流諸州其餘禁繫者委御史臺與諸司計會勅到後五日內疏理訖聞奏

同上

供進井水勅

立春日前內外兩井納水總二千五百段每段長一尺厚一尺五寸宜令府縣勾當澄濾淨潔供進

唐會要五

侍御史據六典舉奏勅

準六典殿中侍御史凡兩京城內分知左右巡察其不法之事謂左降流移停匿不去及妖訛宿宵蒲博盜竊獄訟冤濫諸州綱典貿易賦斂違法如此之類

方合奏聞比者因循務求細事既甚煩碎頗失大猷  
宜令自今以後據六典合舉之事所司有隱蔽者卽  
具狀奏聞其餘常務不須更聞

唐會要  
六十

### 禁濫給驛券勅

諸道進奉卻迴及準勅發遣官健家口不合給驛券  
人等承前皆給路次轉達牒令州縣給熟食程糧草  
料自今以後宜委門下省檢勘憑據分明給傳牒發  
遣切加勘責勿容踰濫仍準給券例每日一度具狀  
聞奏

唐會要  
六十一

### 驛官減選勅



從上都至汴州爲大路驛從上都至荆南爲次路驛  
知六路驛官每一周年無敗闕與減一選仍任累計  
次路驛官二周年無敗闕與減一選三周年減兩選  
同上

置尙藥局醫官勅

殿中省尙藥局司醫宜更置一員醫佐加置兩員仍  
並留授翰林醫官所司不得注擬

唐會要  
六十五

內侍養子勅

內侍省五品已上許養一子仍以同姓者初養日不  
得過十歲

同上

停省州縣佐錄簿尉勅

減諸上州刺史上佐一員錄事參軍司戶司兵司士  
各一員中州刺史上佐一員錄事參軍司戶司兵各  
一員下州刺史上佐一員錄事參軍司戶各一員諸  
州參軍一半諸縣中等已上令一員尉一員下縣令  
一員京兆河南府司錄判司及四赤縣丞縣尉量留  
一半參軍全留餘並停省其諸赤及畿縣每縣留令  
一員丞一員簿一員尉一員餘府准上等州縣例以  
諸州戶口減耗三分去二其官員合省今員闕偏併  
尙未均平宜令所司依前件額卽分析州縣等第與

奏其左降官且仍舊其餘一切權停至來年五月三十日續取處分其應停減官俸糧祿職田雜料手力糧課等一切已上各宜令度支勘審檢收納送上都左藏庫收貯充賞戰士所用

唐會要六十九

省州府判司勅

天下州府別駕及司田田曹參軍除京兆河南太原三府外其諸州府判司雙曹者各省其一錄事參軍准判司例

同上

引接上將軍勅

諸衛上將軍自今以後每朝下馬至朝堂以來宜令

左右金吾作等級差人引接其退朝亦送至上馬處  
唐會要  
七十一

### 放鼓傳點勅

四月一日以後五更二點放鼓契九月一日以後五  
更三點放鼓契日出後二刻傳點三刻進坐牌同

### 條件諸衛并舉武班朝參故事勅

六軍先已有勅各置統軍一人十六衛宜各置上將  
軍一人秩從二品其左右衛及左右金吾衛上將軍  
俸料隨軍人馬等同六軍統軍其諸衛上將軍次于  
統軍支給自今已後內文武官闕于文武班申才望

相當者相參敘用仍待已後各改事于本衛量置衛兵所司續商量條件奏聽進止仍舉故事置武班朝參其廊下食亦宜加給稱令優厚

同上

按全文五十一所收增置金吾十六衛料錢糧課詔互有不同

諸衛將軍入宿勅

左右衛左右武衛左右驍衛左右威衛左右領軍衛左右監門衛左右千牛衛等上將軍大將軍宜于八

宿

同上

宿衛選人予京官勅

選人南北衙宿衛前任京官等前衙帶衛者依資並

予京官

同上

禁軍司違越勅

左右羽林軍飛騎等兵部召補格勅甚明軍司不合

擅有違越自今以後不得輒自召補

唐會要七十二

答吏部奏請量事注擬勅

兩考闕不在用限其三考闕如非當年准格令用除

別勅授官人外亦不在用限如闕員不足選人事須

處分者臨時奏聽進止餘例依

唐會要七十四

契丹首領授官勅

幽州道入朝契丹大首領悔落拽何等五人並可果  
毅都尉次首領王下詔活薛于君等一十六人並可  
別將放還國

唐會要  
九十六

### 停福建選補司勅

嶺南黔中選舊例補注訖給票放上其俸除手力紙  
筆團厨雜給之外餘並待奏申勅到後據上日給付  
其福建選補司宜停其桂廣泉建福賀韶等州宜依  
選例稱補

唐會要  
七十五

### 明經進士人數勅

明經進士自今已後每年考試所拔人明經不得過

一百人進士不得過二十人如無其人不必要補此

數唐會要  
七十六

類補宏文崇文學生勅疑

應補宏文崇文學生員闕至少請補者多就中商量  
須有先後伏請准建中三年十一月勅先補皇總麻  
已上親及次宰輔子孫仍于同類之內所用蔭先儘  
門地清華履歷要近者其餘據官蔭高下類例處分  
唐會要  
七十七

幕府改官折資勅

諸道幕府判官及諸軍將比奏改官例多超越應從



散秩入清望官並折資處分

唐會要七十八

諸道副使等官改轉勅

諸道觀察都團練防禦及支度營田經畧招討等使  
應奏副使行軍判官支使參謀掌書記推官巡官請  
改轉臺省官宜三週年以上與改轉其緣軍務急切  
事跡殊常卽奏聽進止

同上

諸軍文資官不得敘戰功勅

諸軍功狀內其判官等旣各有年限並諸色文資官  
不合軍行自今以後更不得敘入戰功其掌書記及  
孔目官等亦宜准此如有灼然功効可錄任具狀奏

磨勘內侍官結階助

內侍省自今以後高品官白身等官至五品已上合結朝散大夫等階及准格母妻合得邑號并結階累勳階者並宜當司磨勘具銜奏來上同

處分冬薦勅

本置冬薦務在得人自今以後所薦官考試奏入上等人如無他故者准前勅類例處分其下等人有司便以時罷退任待他年重薦如情願同吏部六品以下選不合得留人例請授遠慢官者任經都省陳狀

吏部勘責限等第勅出後一月內送中書門下商量

進擬

唐會要  
八十二

前資官俸料勅

前資官未有功勞不合改轉既無俸料又慮艱辛入

庫之日宜與同類官

同上

訪求醫博士勅

貞觀初諸州各置醫博士開元中兼置助教簡試醫  
術之士申明巡療之法比來有司補擬雖存職員藝  
非專精少堪施用緬思牧守實爲分憂委之採擇當  
悉朕意自今已後諸州應闕醫博士宜令長史各自

訪求選試取藝業優長堪効用者具以名聞已出身入式吏部更不須選集

同上

見任醫官不加料勅

其見任醫術官應非翰林供奉不在加料錢限

同上

停選醫官藥童勅

翰林醫官及藥童自今已後縱考滿并不得于所司選其見選人亦宜停

同上

取諸街枯樹修橋勅

宜令京兆府與金吾計

街枯死槐樹充

修灞澮等橋板木等用仍栽新樹充替

唐會要八十六

選官專知斗門勅

漕運通流國之大計其河水每至春夏之時多被兩岸田萊盜開斗門舟船停滯職此之由宜委汴宋等州觀察使選清强官專知分界勾當其鄭州徐州泗州界各仰刺史准此處分仍令知汴州支遣院官計會勾當

唐會要  
八十七

諸陵四面三里內不得葬勅

勅諸陵柏城四面合各三里內不得葬如三里內一

里外舊塋須合祔者任移他處

唐會要  
二十一

禁銷錢勅

今後天下鑄造買賣銅器並不須禁止其器物約每斤價值不得過一百六十文委所在長吏及過院同勾當訪察如有銷錢爲銅以盜鑄錢罪論

唐會要八十九

### 賜渾瑊勅

今賜卿筆一管空名補牒一千紙有立功將士可隨

大小書給不必申覆如有急令馬希倩奏來朕今與

卿訣畫境錄

### 又勅

今賜卿劍一口上至天下至泉將軍裁之

同上